



Il schef da la fracziun cristiandemocratica dal cussegl grond Marcus Caduff. FOTO O. ITEM

■ FRACZIUN DA LA PCD

Pretenda investiziuns en l'infrastructura

(cp) La fracziun da la Partida cristiandemocratica (pcd) en il cussegl grond è sa radunada da curt – sut il presidi da deputà Marcus Caduff ed en preschientscha da cuss. gov. Mario Cavigelli – en la scola s. Catarina a Cazas. Ella ha predeliberà tant il program sco er il budget 2016 dal chantun e beneventa fitg la revisiun parziala da la lescha da malsauns per promover l'abitar tgirà. En la sessiun d'october ha il cussegl grond approvà ina proposta che pretenda da tgirar meglier asilants minorens ch'èn sulets. Quai succeda per gronda part en la scola da s. Catarina a Cazas. La fracziun ha pudì prender invista en il lieu e beneventa l'engaschi da la scola persuentar. Qua vegn ademplì in pensum enorm per integrar fugitivs che vegnan tar nus.

Il program da la regenza ed il preventiv 2016 – cun in deficit da ca. 50 milliuns francs – è vegnids disputads intensivamain. Discussiun hai dà pertutgant il svilup per spazi e colonisaziun. La realisaziun da la revisiun parziala da la respectiva lescha federala ha grevas consequenzas, principalmain per las muntognas e regiuns periferas. La fracziun è persuadida ch'ì dovra tar la difficila situaziun en l'economia e turissem urgentamain investiziuns en l'infrastructura. La fracziun beneventa la revisiun da la le-

scha da tgirar malsauns. Cun quella duai l'abitar sut tgira vegnir rinforzà e promovì sco alternativa visavi ir en chasa da tgira. Qua tras pon ils custs vegnir sbassads.

La fracziun sustegna las fusiuns da las vischnancas Surses, Luzein, Claustra-Serneus sco era Sursaiša Mundaun. Persuentar è era commembers da la pcd s'engaschads fitg. *Gian Sonder* (pcd/Salouf), suppleant da deputà, ha presidià il project da fusiun Surses ed è vegnì elegì cun in excellent resultat en la suprastanza da la vischnanca fusiunada. La fracziun sa legra era fitg che deputà *Ernst Sax* (pcd Sursaiša) è vegnì tschernì onurificamain sco president communal da Sursaiša Mundaun. Ella gratescha als elegids.

La fracziun da la pcd ha era tematisà la lescha da publicitad. Be il chantun è da suttamerter a quella. Tuttas autras corporaziuns, sco las vischnancas, districts, circuls, resp. da nov las regiuns, na duajan betg sutastar a quella lescha. Ins na las vul betg engrevegjar administrativamain pli fitg. La fracziun da la pcd refusa cleramain la suttemessa obligatoria da vischnancas e regiuns a quella lescha. Las vischnancas duajan sezzas decider sch'ellas veglian far quai u betg.

La sessiun da december dal cussegl grond entschaiva glindesdi proxim, ils 7 d.q.